

羣

書

疑

辨

羣書疑辨卷第十二

目錄

讀太祖實錄

讀孝宗寔錄

讀寶錄邱文莊傳

讀倪文毅傳

讀白昂傳

讀史琳傳

讀劉宇傳

讀高銓傳

讀楊文忠傳

讀梁文康傳

讀席書傳

讀霍韜傳

讀何鰲傳

讀聶貞襄歐陽文莊傳

讀唐襄文傳

讀許論傳

讀楊襄毅傳

讀劉肅傳

書討安南詔書後

書劾胡宗憲疏後

書張居正傳後

書彈園雜誌後

書駁駁漫錄評正後

書從吾錄後

追記先世所藏令旨事

書先世救命後

書家乘外集羣公手札後

書丙子鄉試錄後

羣書疑辨卷十二

四明萬斯同季野纂 同邑後學水雲時叔校

讀太祖實錄

高皇帝以神聖開基其功烈固卓絕千古矣乃天下既定之後其殺戮之慘一何甚也當時功臣百職鮮得保其首領者迨不爲君用之法行而士子畏仕途甚于奔坎蓋自暴秦以後所絕無而僅有者此非人之所以敢謗亦非人之所能掩也乃我觀洪武實錄則此事一無所見焉縱曰爲國諱惡願得爲信史乎至于三十年間蓋臣碩士豈無嘉謨嘉猷足以垂之萬

祀者乃一無所紀載而其他瑣屑之事如千百夫長之祭文番增土酋之方物反累累不絕焉是何暗于大而明于小詳于細而畧于鉅也洪武之史凡三修其一在建文之世其一在永樂之初此則永樂中年湖廣楊榮金幼孜所定也吾意前此二書必有可觀而惜乎不及見也若此書者疏漏已甚何足徵新朝之事寔哉君子卽不觀可也

讀孝宗寔錄 二則

有明之寔錄未有若弘治之顛倒者也蓋總裁于焦芳而撰述于段冕輩宜其如此吾竊怪當時諸公如李文正王文恪楊文忠梁文康皆有總裁之責何乃一無糾正而任其顛倒若是耶中書之堂旣已伴食蘭臺之內又欲隨人曲筆耶甚哉諸公之廢也一焦芳以附瑾之故筆削之際猶且不敢逆之則當瑾之橫行而曰吾將有所補救吾不知所補救者何事也卽畏芳之肆螫獨不畏萬世之公議乎與之同官而猶若此將古之筆枋頭之敗而詳張說之事者獨

何人也吾是以益嘆古人之不可及而知有明寔錄
之未可盡信也

孝宗爲一代守成令主而寔錄所紀當時之弊政何其多也蓋帝務通下情人人得以盡言故有過舉鑒形之于奏牘人之見之者以爲帝德之有失也而不知正其能納諫之美也向非帝能納諫羣臣安敢盡言後人亦何由知其詳哉至如嘉靖之世其治亂視此不啻什伯今讀其史其弊之大者固已章著而其小者反不若此之數數然彼豈無失之可指乎亦羣工百職箝口而不敢言故後人無由知其詳耳且孝

宗十八年之間國家最爲無事而寔錄卷帙之多反有過于諸帝亦由奏疏之多耳余恐讀者不察徒見其疵而不見其美也于是乎言讀是書者其尙以是求之

讀實錄邱文莊傳

自古右文之朝孰不以藏書爲美哉秘書之缺畧而不備未有若明代之甚者也雖內之文淵閣外之翰林院國子監皆爲藏書之府然藏之無幾而其所藏者又皆禁而不許觀故直文淵閣者不得言文淵之書官翰林者不得披翰林之籍其在國子亦然不過每歲一晾以防蠹朽而已夫天子旣不留心于載籍而學士大夫又不敢觀中秘之書則書籍之不備亦何傷之有顯士庶之家猶且購書以垂子孫而石渠之中蘭臺之內反缺畧而不備毋乃非盛事乎哉邱文

莊之初入閣也嘗承孝宗之命于所著衍義中撮其
藏書之條疏爲萬言以入告乃亦迄無舉行者夫以
天子之所咨訪宰相之所敷陳然且格之而不行又
何望于他日耶甚哉好文之主之難遇也大祖雖得
天下于馬上然能投戈講藝釋轡論文故御集獨多
于諸帝太宗之樂觀大典宣宗之雅號知書亦爲帝
王之難事世宗于孔廟明堂諸大禮嘗親爲文以折
羣臣至于制書手勅何多詰屈而難曉也豈有得于
太祖之家法耶嗚呼帝王好文之難如此則秘書之
缺畧而不備也又安足怪哉

讀倪文毅傳

以下皆寔錄本傳

世言張居正爲相摧抑天下之士士之取入學校者
每邑不過數人甚者止于一人以爲居正阻抑賢路
之罪不知當弘治時倪文毅岳爲宗伯嘗有是令雖
大縣亦不過七八人不獨居正爲然也夫孝宗當一
代文明之會人才奮興多士蔚起正宜鼓舞造就之
時也乃始進之途如此其隘天下士子之憤怨當何
如耶人但知弘治之世爲極盛之時豈知士風之不
振至于如此則文毅阻抑之罪不與居正同一律哉
天以文毅之賢而所爲若此又何責于居正吾所以

觀孝宗實錄而深爲文毅惜也

讀白昂傳

孝宗之君德何其盛哉其大者尤在于用人我觀十八年之間自內閣以至百執事鮮不得人六卿之中最爲人所訾議者無如白昂徐瓊徐貫彼固無甚顯過使其當正德嘉靖朝猶足以稱名臣若其磊磊落落爲一代偉人者多出弘治之世何其盛也然白徐諸公當此清議大行之日猶爲人所指摘苟汙濁之朝又當何如耶此尤君子所當深責也

讀史琳傳

傳稱琳通曉兵法兼善諸家占候之術故朝廷凡數
出師皆命之總督蓋以知兵受任也凡十三年火節
爲難平慶臨鞏之間流血千里琳爲通帥不能赴救
其搗巢也以數萬之師獲首止千三級知兵者固如
是乎吾觀當時八座諸公固未有傑然可當邊疆之
任者僅一許襄毅以糾合將帥而罷去使琳得當其
任亦可見邊才之難得矣幸火節之倡獫狁未若吉囊
俺答之甚耳使有如一酋者琳其何以應之甚哉有
明武備之靡也以孝宗之賢馬端肅劉忠宣之爲本

兵而邊烽一舉輒勞拊髀然則嘉靖末之爲邊帥者
固未可深責哉

讀劉宇傳

劉宇之以司馬遷家宰也文吏納賄不如武弁之多
遂頓足長嘆恨不久居司馬此猶足見士大夫承弘
治之後寵賂雖章尙未至于極濫也吾聞嚴嵩父子
之初得政也以得貲百萬爲願歛之久而後滿數爲
大宴以慶後則數年而舉宴者再三矣蓋流極之勢
固然無足怪雖然使其處魏黨則一歲之中亦可頻
舉宴矣又何待于數年哉幸二兇之不處魏黨時也

讀高銓傳

士風之變易也豈不易哉方弘治之世人人自愛而
尚名節重廉恥豈不誠忠厚之俗耶及劉瑾一出向
時之大僚遂蒙面濡首爭先屈膝而不恤而高銓之
子至自劾其父衣冠變爲異類何其甚哉乃知若輩
之在先朝非果能自立也幸士習方隆故不至敗露
耳一旦隄防旣壞遂放濫決蕩而不可收拾矣然則
中材之士處盛朝而保其名行遇濁世而決其防檢
者何可勝數彼固有幸不幸哉

讀楊文忠傳

文忠之相業其大者在定江彬之亂而登極一詔尤
有功于帝室使數十年之積弊一旦盡去已受其怨
而貽國家無窮之利上不使新主蒙寡恩之譏下使
天下有更生之樂卽此一詔其相業之俊偉已踰于
前後數公迨新天子登極不必有所更張而天下之
規模已煥然爲之不丕變嗚呼何其烈也當是時正人
君子布列朝端百司衆職莫不得人天下之士皆欲
有所發舒以赴功名之會一時望治者無不以爲太
平可俟矣使從此君臣相得信任老臣何難致一代

之盛治哉自史道發難而廟堂之罅隙始萌曹嘉繼起而水火之情形益著至大禮議定天子之視舊臣元老真如寇仇于是詔書每下必懷憤疾戾氣填胸怨言溢口而新進好事之徒復以乖戾之性佐之君臣上下莫非乖戾之氣故不十數年遂致南北大亂生民塗炭流血成渠蓋怨氣之所感不召而自至也由是觀之和氣致祥乖氣致戾豈不諒哉故愚常以大禮之議非但嘉靖一朝升降之會寔有明一代升降之會也嗚乎舊臣元老國家所視以爲安危也乃去之惟恐不盡而盡用新進好事之徒彼新進好

事者何譬無矯矯可喜之功顧損國家之元氣亦已
多矣故張璪桂萼用而元氣爲之一喪汪鉉夏言用
而元氣爲之再喪迨嚴嵩父子用而元氣爲之喪盡
矣使繼嵩之後者非徐文貞則末流之弊更將何所
底止哉得文忠以救其始得文貞以救其終故四十
五年之間雖主昏于上民變于下而宗社不至于亡
也語嘉靖之相業者其尙求之二公乎

讀梁文康傳

文康居內閣十二年其功烈卓然可紀者何少也有明閣臣之制權歸首輔次者不得有所揣故論相業者必于首輔求之文康嘗爲首輔三年矣何亦少所表見也吾初讀皇明通紀及霍韜黃佐所作文康傳見所載草敕之事未嘗不嘆其事之偉也後讀趙文肅楊公神道碑及王元美所辨草敕之事又歸其事于楊文忠傳聞異詞如此吾安所適從然欲竟屬之于文康吾亦有所不信也諸家野史載文康子次據因爭田事殺楊氏一村二百餘人吾始不信後讀武

宗寔錄始信其誠然夫身爲宰相而子不道至此旣不能正子以法又不能引罪求歸任臺諫之交章而安然不動何顏之厚也正德之末四相同朝乃世宗卽位首罷其相余初亦疑之以上方圖任舊人何罷之驟也後乃知諫官論列不爲公論所容耳由此觀之文康之爲相賢耶否耶亦可以決矣余觀國史本傳不置褒貶世之論文康者好之則過于褒惡之則過于貶余亦何能定其爲人姑撮寔錄之所載與諫官之所劾者書于傳末庶可考而知焉若陳建之通紀寔文康之弟億所著故多譽兄之詞尤不足信讀

者母爲耳食可也

讀席書傳

異哉議禮諸人何心術之若一也席書以仇宋卿之
故于殺人爲盜之李鑑而欲釋之此與張桂之釋李
福達何異恃主之寵而恣肆橫行此小人無忌憚之
爲耳書素號清流以博講學之名者何乃至是耶雖
然非獨書也陳洸之兇淫暴虐乃衣冠而盜賊霍韜
必欲雪而用之此與書之釋李鑑又何異吾不意數
人之心術竟如一人也大禮之議本違聖經乃因此
蒙眷遂欲盡反天下之公論而事事與之立異吾因
謂其初之所議不過于寵希進而然非真能有所見

讀霍韜傳

嘉靖間議禮之謬未有若霍韜方獻夫者也其附會
張璁而力主繼統之說已爲悖理至纂修大典申辨
爲人後之義遂詆及于師丹呂誨諸公而尤痛詆司
馬君寔何狂悖之甚也世宗之入繼原與漢哀宋英
不類故得以不考孝宗爲辭乃因世宗不肯爲人後
遂并爲人後之文而欲去之何敢于背經畔聖肆無
忌憚若是耶爲人後之說非漢宋諸賢之所創而哀
帝英宗寧得不考成仁二主哉特君之寵而縱肆肯
戾朝端之議論固可假主威而壓之矣天下萬世之

會論彼亦欲盡抹之乎甚哉小人器量之淺也人主
畧加以恩寵遂人人咆哮跳踉若獬犬之狂噬而霍
韜有期之喪至自比古諸侯不服期之義公然犯天
下之名義而不恤猶自謂已知禮已知學嗚呼其所
議者何禮所講者何學哉誠吾所痛心疾首者也

讀何鰲傳

史于鰲之卒稱其清正諒直有古大臣風嗚呼何其
謬也嘉靖間刑獄之冤者無如楊員外張司馬李中
丞及楊給事李家宰乃皆鰲爲司寇時所定卽曰主
之有人何不聞一言爭執耶官至六卿卽獲譴而退
有餘榮矣可隨人輕重而不恤耶漢史極稱于定國
之廉獄而趙蓋韓楊之死皆在其手後人不能無議
今鰲安得獨寬其責也鰲山陰人其父詔亦爲尙書
余嘗問其鄉人言詔生數子其後多讀書者惟鰲之
子孫皆不慧張元忭修越志于鰲亦無所稱許鄉人

之言如此豈可信不誣孰謂古大臣而若是耶是時
職邦禁者惟劉訥于王聯一獄稍能執奏其他如鄭
曉之于楊順阮鶚黃光昇之于海瑞或出或入皆不
免于骹法又寧獨一鰲也哉此趙綽徐弘敏所以彌
令人思也

讀聶貞襄歐陽文莊傳

雙江南野皆受學陽明之門世之論其學術者未
能置優劣者也乃國史于南野則極其褒于雙江則
多所貶若是者何也吾謂國史之言皆是也直二公
所處不同耳雙江當南北交訌之時身萃天下之責
自正統己巳以來未有若是時之難爲者也而且以
世宗爲之君嚴嵩爲之相動多掣肘謗卽隨之其得
易言勝任哉若南野所處則雍容禮樂之場優游典
制之府稍有文學知故寔者足以任之矣曩令雙江
而爲宗伯未必不如南野令南野而爲司馬亦豈能

遠勝乎裴江哉任職有剝易而短長以見甚哉人之
幸不幸也雖然裴江之爲司馬固有不滿人意者焉

讀唐義文傳

初讀國史唐公傳曰此忌者之口也不足置辨已而
念公賢者受誣至此安可不爲之辨公抱負長才林
居不試睹鄉邦之塗炭思起而救之適會趙文華荐
朝廷有夏官郎之授遂以應命其出處如此乃傳謂
公以策于文華因以得進吾觀公文集有却趙侍郎
饋遺一書彼于匪人交際猶且却絕安肯以策于之
文華之荐亦由自知其才欲以博荐賢之名耳豈公
于之而後荐耶若以文華之荐爲公累時與公同荐
者尚有胡松周相翁大立季文進秦鳴夏五人惟鳴

夏赴官道死餘皆至顯官議者未嘗以文華故責此
五人何獨爲公累也史于胡公傳備詳其善狀而不
言文華之薦獨于公之傳言之不置同出一史而筆
削如此豈非有挾而然耶傳又謂公初欲獵奇致聲
譽屏居十餘年上方摧抑浮名無寔之士言者屢荐
終不見用夫公以弱冠登上第一時文名籍甚恐名
浮于寔故力斂闇然之學雖詩文亦鄙而不爲何嘗
無聲譽而須獵奇以致耶其不見用乃當路者不悅
上何嘗有意摧抑之而公亦豈浮名無寔者耶又謂
公初罷官力爲矯亢之行非其人不交非其道不取

天下士靡然慕之既久之不行晚乃由文華之進夫
天下固有非人不交非道不取者而肯變節以希進
耶何其量天下士之薄也其爲此言不過謂公欲得
官耳公誠欲得官其初嘗兩爲翰林何不優游文史
之地馴致通顯而乃至屢得屢失耶始棄翰苑之華
階而晚求部曹之冗職亦大非人情矣至謂公以邊
才自詭旣假以致身遂不自量欲以武功見盡暴其
短爲天下笑夫公以戊午冬始以郎官視師至己未
開府淮揚僅六月而卒其初則權輕不足以集事其
繼則受任日淺故不能大有所展布然公兩以病軀

揚帆海外巡歷而歸諸將導導悚息軍容爲之一振
屢有駢馘功三受金錡之賜一時勞臣宜無如公者
志雖未竟天下皆嘆其忠何短之暴而又何人笑之
使當是時任事者而盡如公何至若是之靡爛以公
之勞勤而猶責之如此又何以責他人甚哉忌者之
口可畏也蓋睹鄉邦之塗炭而思救之者其本志也
不得竟其志者限于年也奈何欲沒其生平而誣詆
至是哉吾觀國史前後諸傳其褒貶不過數語獨公
此傳一事而言之再三彼將以是深章其醜不知適
足自形其爲忌耳自古史官挾私以枉人者何限吾

于公獨深有感也故爲之辨

讀許論傳

嘗讀許恭襄九邊圖說未嘗不嘆其討論之精綜理之善也以爲使當其事宜必有可觀者後邊疆多難論以此書故當寧遂以遼才目之凡嚴疆要任多以相委宜其向所論著悉見之于行事矣乃左支右吾卒未有卓然可紀之功而其居本兵也委身嚴氏頗以溺職聞何其名寔之相背與其所論著者固可言而不可行與蓋空言易而措施難大抵然也爲國用人者尙核其寔而毋徒取其言哉

讀楊襄毅傳

嘉靖之際大臣以身係天下重輕者吾得二人焉前

惟翁襄敏

萬達

後則楊襄毅

博

而已翁公蚤沒不得

竟其志楊公則賦歷中外天下鉅任悉以授之隨施而效在公可謂不負乎天子而天子亦可謂用公之長矣然甲子灤東之沒非徐文貞調護卽不受汝襲之律亦不免伯溫之譴矣公固適逢其幸哉獨怪以公之猷畧與天子之所以委任公者宜其建不世之勲爲天子釋南北之憂乃卒未聞內修外攘有如向之于忠肅公者何也豈固時不同耶抑才有所限耶

吾蓋觀前後之爲司馬者而益嘆忠肅爲本朝第一人也

讀劉燾傳

自南北多難以來廟堂悉知兵之士一時所用以禦盜者往往卽昔日之盜如劉燾高捷尹耕雖發身科目其初固盜首也耕爲兵備以贖貨而罷捷爲操江以避寇而罷燾則南北疆場巨任靡所不歷庶堂雖知其貪黷而卒不能舍也嗟乎士當承平之時率相矜以文墨一旦有事遂使盜得志于天下亦可慨已夫天下方苦盜而使盜得據吏民之上盜何由息哉顧其人誠足以禦盜用之亦何傷乃彼自爲盜則有餘爲國家禦盜寔不足亦安賴夫若輩而用之雖然

彼仕官而爲盜者寧獨燾三人也吾安從別三人之爲盜也

書討安南詔書後

嘉靖安南之役是豈不可已者哉幸我師未出彼先
納款故天下猶未大被其害不然東南數百萬之赤
子其死于轉輸戰鬪者可勝言哉時惟潘公珍唐公
胃潘公旦嘗以疏諫其他三事大臣率視君意爲可
否而司馬毛伯溫者從衰經之中起而身任其事彼
將求不世之大功耶恐未可倖也以章皇帝之賢一
時謀臣猛士之盛正當國勢方強之時已得之交趾
猶且委而棄之則當嘉靖之世而欲勞師萬里以倖
不可知之功豈可得哉吾觀世宗當日原非有意必

計也故屢發屢止使爲大臣者能力阻之則事可中止何至調兵徵餉勞費我父老爲乃當時諸臣見二公以言受譴遂箝口而不敢言嗚呼軍國何事也而爲謀若此後之觀史者不且有舉朝婦人之嘆哉

書陸給事

鳳儀

王御史

汝止

劾胡宗憲二疏

國史

無宗憲傳
故題疏後

宗憲之爲害于吾浙也可勝言哉自借軍興之名行
提編加派之法而民之苦賦甚于苦賊宗憲以朘之
民間者半奉權要之歡半供聲色之欲故盜賊雖衰
加派不止而民之苦宗憲更甚于苦賊當世之人第
見其有平寇之功而真以爲豪傑之士也亦已惑矣
吾嘗攷其生平始也締趙文華爲石交而因以進用繼
也結羅文文爲死友以籍其彌縫陷張經而攘其功
傾李天寵以奪之位此其罪狀之顯著者恐廟堂之

疑我而當世之士或不我恕也于是獻祥瑞以固主
眷輦金錢以酬相恩而又以其餘漚啗天下失職之
名士故當塗者既飽其欲而莫發其奸握槩者亦感
其私而爲之稱功頌德播于詩文以塗人之耳月上
下交歡自以爲術之工矣豈知有不畏強禦如二公
者以繩其後哉吾嘗聞諸禾人自提編法行加派于
禾郡者畝幾一金至今言之猶有餘恨卽一郡而他
郡可知使宗憲不去吾浙人其尚有皮骨哉則二公
之有德于吾浙誠不可忘也若夫島寇之滅雖見以
爲有功然連地五省歷時八年徵數十萬之兵糜數

千萬之餉又合諸文武將帥之力而僅克勝之亦云微矣其尙以爲不世之功哉凡宗憲之罪狀其載于二疏散見于國史及王元美所紀者吾不具論論其害于吾浙者如此若自擬詔旨以投世蕃尤罪之不容誅者其死于詔獄豈不幸哉

書張居正傳後

關中馮恭定公嘗論張居正有十大罪余更廣之為

二十四大罪首逐顧命元老一也交結近侍馮保二

也父死不奔喪三也謫削忠諫之臣四也劉臺傳應

吳中行趙用賢沈思孝艾穆鄒元標兩宮並尊亂屢

朝嫡妾之分五也穆宗附庸神主不由中門使天子

得罪于其父六也廢錮天下名賢七也陸樹聲畢鏞

萬士和宋繻陸光祖王遴陳有年海瑞曾全亨魏李

自姜寶袁洪愈引用天下凶邪八也李幼滋曾省吾

凡二十餘人王象王宗載胡積勞人堪于應昌陳三謨曳白之子皆登上第九也王蔚傳作舟陳世寶

王府爲私第十也祖制百里內不視朝親王者罪死而居正與親王抗禮致親王城迎接十一也殺僇天下名士吳仕朝梁元輩十二也以私憾致侍郎朝選于死十三也哀麻之中蟒服巡城十四也每歲決囚勒爲定額十五也以催科爲考成使吏治大壞十六也禁天下報災異十七也用游棍徐爵爲錦衣傳道禁中消息十八也縱家奴游斥于外干預部院公務十九也興王大臣之獄幾殺顧命大臣二十也祖訓請設丞相者全家處斬居正公然自稱爲宰相二十一也盡攬部院之權使九卿不得舉其職二十

二也廢毀天下書院禁士子不得講正學二十三也

任用頑鈍無恥之徒布滿高位使朝廷無一正人二

十四也

王國光殷正茂張李顏方逢時陳潘晟陳瑞劉堯誨何寬梁夢龍徐學謨高文荐周詠

王緝陳思育高啓愚

書彈園雜誌後

甚哉伍袁萃之妄也其禠志所載大要爲辛亥京察一事耳辛亥之役孫公丕楊爲冢宰凡小人之號爲宣黨崑黨者斥之殆盡而王紹徽喬應甲亦在其中紹徽素有清譽應甲嘗劾李三才萃深惡三才凡劾三才者皆稱之爲豪傑故爲二人不平于察典旣竣小人之擊孫公者極其褒美而君子之持正議者痛加詆毀自以爲春秋之筆矣迨魏忠賢一出向之褒美者鮮不失身喪節如徐北魁邵輔忠徐紹吉劉廷元及紹徽應甲後皆入逆案內而其所詆毀者獨能保其身名于是袁萃之論不攻

而自敗使其目覩魏賊之禍何待他人之毀其書當
自毀之恐後矣甚哉立言之不可易也袁羣之爲此
志豈有意于仇君子庇小人惟所見一偏遂以至此
然則君子之欲立言者可自逞其胸臆哉

書駁駁漫錄評正後

始伍袁萃爲林居漫錄而賀燦然駁之曰漫錄評正
袁萃又取評正駁之曰駁漫錄評正已而燦然復取
袁萃之所駁者駁之曰駁駁漫錄評正皆以爲刊布
焉事起于袁萃之譏燦然而燦然爲之報復耳吾謂
袁萃之乖僻其持論固未必盡當而燦然之挾忿詆
訐亦不足爲寔論也蓋萬歷己巳之春少宰楊公時
喬總憲溫公純主京察于臺省之爲權門効力者多
所貶黜相臣欲留之察疏久入而不下一時諫者反
爲謫降燦然以銓部郎繼言之亦遭罷黜察疏乃下

燦然方以此舉爲名高袁萃于漫錄中謂其疏旣攻
被察者不當復攻主察者訛其承相臣風旨於是二
人之隙遂不可解而彼此訐發幾如兩造之訟夫燦
然心術固不可知然彼旣建言被黜亦可稍恕乃袁
萃必欲攻發其陰私以章己之直筆不亦過甚已哉
夫德非聖人職非史官好著書以褒貶當世之公卿
大夫縱使褒貶悉當亦不免當世之忌况其所褒貶
者原未必盡當乎宜其爲人所詬厲也然則爲燦然
者固失之于逞憤而爲袁萃者亦無輕于著書哉

書從吾錄後

從吾錄者匪人吳玄之所輯也凡萬歷中小人攻君子之說無所不載永復爲說以揚之而當世君子多爲其所招擊焉當神宗之季羣工水火蒼素混淆然而邪正之際固不難辨也玄身在事外何仇于君子而顛倒若是豈有所不容已耶呈身醜類獻媚當途所得幾何而甘心爲此吾不能爲之解矣雖然世之身在事外而顛倒黑白呈身獻媚者又寧獨一玄哉玄武進人其父中行以編修諫張居正奪情廷杖削籍爲清流所宗其兄亮官御史入東林亦爲清流所許玄乃青父兄附邪黨公然爲名教之罪人真小人無忌憚之尤者

追記先世所藏令旨事

明太祖之未踐祚也實奉宋主龍鳳之朔至丁未安豐既陷始改號吳元年其前之稱行中書省丞相暨吳王皆宋主所命也愚幼時猶及見太祖授我

始祖令旨二道其一方爲丞相時後題龍鳳五年其一則爲吳王時後題龍鳳十年而二札之上皆大書皇帝聖旨則是太祖之初受命于宋主明

甚今國史及諸家傳記皆沒而不載其意蓋爲國諱也不知此何必諱漢主不常受命懷王乎韓氏之興與懷土何異不聞漢史爲高帝諱今國史何必爲

太祖諱也况韓氏事雖不成而下中原墮上都雲
擾六合卒致元氏失國皆其首發難之功則其所驅
除寔開 太祖之先初非漢樊崇隋楊玄感之比
綱目于玄感諸人猶未嘗書之爲盜則韓氏之立國
何不可大書特書而乃爲 太祖諱也他書言歲

元旦 太祖欲設宋祖位而劉誠意去之則此歲
之前 太祖固未嘗不奉以朝也 太祖身未

諱而史官無識致沒其寔甚可恨也愚故追記之如
此他日修正史者或可以是一証而正舊史之失

云

書先世敕命後

曩高皇帝錫我始祖之命曰萬斌起事之初與于定遠始克滁城卽宜其武和陽之捷功益懋焉誥詞褒許如此則是先將軍之與高皇帝寔同起于草澤者也與徐湯諸公結布衣昆弟之歡者何異守滁十數年淮西盡失滁獨無恙與耿吳二侯守長興江陰者何異後且從克建寧殞身沙漠功烈章章如是縱不得與建方面之勲者世守帶礪使得生列環衛而沒腐封爵亦其宜也乃身止武畧之階至我二世祖積功始得晉秩明威延賞于世小臣卽不

敢望而帝所以酬之者何其薄也後讀國史見開
國三等之封凡六十有四人而延及後嗣者僅魏國
黔國武定三人至肅皇帝繼絕始續懷遠靈璧定
遠臨淮四侯暨誠意伯而八則又未嘗不訝然嘆曰
我祖之薄取于國者正天之所以厚報萬氏也曩
令我祖得膺茅土未必不與馮廖諸公同爲皂隸
亦安能世世蒙澤至三百祀之外哉乃知向之六十
餘國未必盡幸而四伯九十衛諸臣未必盡不幸也
天道薄取而厚償以是觀之益信

書家乘外集羣公手札後

夏日無事與六兄充宗閱家藏羣公手札見有冢宰
汪鉉與高王父中丞喬應甲與王父一書同曰
是小人之尤也曷斤之充宗曰然已而充宗整家乘
錄羣公手札于外集中遂棄二札不錄愚是益咲
奸徒之不容倖免而小人之爲人唾罵無已時也方
二人致書于我一巡撫南贛一巡撫淮揚其罪狀猶
未甚敗露也然君子醜其末去之唯恐不亟其他若
趙莊靖若鄒文莊雖片紙而不遺若文徵仲若王稚
宜雖布衣而必錄家乘之中而寓春秋之法焉何其

外紀 卷之二十一
嚴也異時吾子孫觀此尙爲集中之所載者不爲集中之所棄者庶幾不墜吾祖之教而亦充宗所以採輯之意也嗚呼人其可不自立哉

書丙子鄉試錄後

崇禎丙子科浙江鄉試舉者凡九十七人而吾邑得其八舉進士者凡四八人之中錢公希聲以監國大學士從亡海外克追陸丞相張樞密於鯨波間周公唯一解順德之綬披衲入山長往不顧有壁立萬仞之概謝公于宣服官行人遭甲申北都之變受刑而死亦不失節董公天鑑監先君子却公車之徵坎壈窮餒沒齒不悔其無聞者僅三焉夫一邑之中一科之士而得全節者五人何其盛也余因是歷攷前此數科及後此兩科皆無如是科之盛卽是科之中

其他十郡七十四邑亦無如吾邑之盛又何奇也嗚呼得士如此使得高步昌辰當必有所表見乃遭逢歲寒各守彭越之遺則不以勲業著而以節義聞是雖甚盛亦何其不幸哉此又非余所知也